

11-D17-Sy شو بدي أعمل؟

طبعاً، شُفتوني أكثر من مرة، وعرفتو إني في شوية مشاكل بيني وبين مرتي رنا. أنا حابب أحكي معكُن شوي واسمع رأيكُن. بس بالأول بدي عرّفكُن عن نفسي أكثر.

أنا اسمي ناصر الحلبي، من مدينة حمص. وبشتغل موظف بوزارة السياحة. الحمد لله مبسوط بشغلي وحياتي. وعندي ولد اسمو مروان. مروان هلاً طالب ابتدائي. بحب عائلتي كثير، بس في شوية مشاكل بيني وبين مرتي رنا بسبب الشغل.

أنا ورنّا تعرفنا على بعض من لَمّا كُنّا طلاب بالجامعة. وحبّيتها من أول مرة شفتها فيها. بس طبعاً ما قلتلها هذا الشّي، لإني كان بدي أتعرف عليها أكثر. وكمان، بيني وبينكُن، أنا كنت خجلان، وما كنت بعرف شو بدي قول، لإني ما كان عندي تجارب عاطفية بحياتي قبل رنا. فبالأول كانت علاقتنا علاقة زمالة، صداقة وبس. كانت لطيفة وحلوة وكلها حياة. وكنا نقعد في كافيتريا الجامعة ساعات وساعات. منحكي عن الدُّنيا والدراسة والمستقبل. وكنت استمتع بكل دقيقة كنا نقعد فيها مع بعض. وبعدما تخرجنا من الجامعة خطبتها وجوّزنا بعد سنتين.

وبعدما وُلِد مروان كان لازم أشتغل شغل تاني، لإني الحياة صارت غالية. أخي صيدلاني وعندو صيدلية قريبة من بيتنا. أنا بساعدو بحسابات

الصيدلية. الشغل كثير منيح، بس بدو وقت كثير. ومنشان هيك،
صارت رنا تزعل منّي، لإنو طول نهاري بالشغل.

هي بتحب السهر والطلعة مع رفقاتها، وأنا ما بحب الطلعة كثير. بحب
أقعد بالبيت، أشتغل واشرب شاي واشوف التلفزيون واشوف أصحابي
هون. لا قهوة ولا مطاعم ولا مول.

شو بدي أعمل مع هالمشكلة؟ شو رأيكن؟ فيكن تساعدوني؟